

14. október 1988

1199

Nr. 463

REGLUGERÐ

um Atvinnutryggingarsjóð útflutningsgreina.

1. gr.

Hlutverk Atvinnutryggingarsjóðs útflutningsgreina er að veita lán til endurskipulagningar, hagræðingar og framleiðniaukningar hjá fyrirtækjum er framleiða til útflutnings. Jafnframt skal sjóðurinn hafa forgöngu um að breyta lausaskuldum fyrirtækja í útflutningsgrein-um í föst lán til langs tíma.

Heimili og varnarþing Atvinnutryggingarsjóðs er í Reykjavík.

2. gr.

Fyrirtæki koma því aðeins til álita við lánveitingu eða skuldbreytingu, samkvæmt reglugerð þessari, að grundvöllur teljist vera fyrir rekstri þeirra að loknum skipulagsbreyting-um á fjárhag þeirra og rekstri.

3. gr.

Forsætisráðherra skipar stjórn Atvinnutryggingarsjóðs og veitir henni lausn. Fjármálaráðherra, iðnaðarráðherra, sjávarútvegsráðherra og viðskiptaráðherra tilnefna hver um sig einn stjórnarmann en einn skal skipaður án tilnefningar og skal hann jafnframt vera formaður sjóðsstjórnar.

Forsætisráðherra skipar varamenn í stjórn Atvinnutryggingarsjóðs. Skulu þeir tilnefndir á sama hátt og aðalmenn.

Forsætisráðherra ákveður þóknun sjóðsstjórnar.

4. gr.

Bygðastofnun hefur á hendi rekstur og reikningshald Atvinnutryggingarsjóðs í umboði og undir eftirliti sjóðsstjórnar.

Endurgreiða skal Bygðastofnun kostnað af rekstrinum eftir nánara samkomulagi milli Bygðastofnunar og stjórnar Atvinnutryggingarsjóðs.

5. gr.

Ríkisendurskoðun skal fylgjast með starfsemi Atvinnutryggingarsjóðs og gefa Alþingi árlega skýrslu um starfsemi sjóðsins.

Ríkisendurskoðun annast endurskoðun reikninga Atvinnutryggingarsjóðs. Skulu reikningar sjóðsins, ásamt yfirliti yfir afgreidd lán og ábyrgðir, birtir árlega.

6. gr.

Stjórn Atvinnutryggingarsjóðs ákveður lánveitingar úr sjóðnum og geta einstakir stjórnarmenn haft frumkvæði um einstök mál eins og tilefni er til.

Sérstök samstarfsnefnd lánastofnana atvinnuveganna og Bygðastofnunar gerir tillögur um lánveitingar til stjórnar Atvinnutryggingarsjóðs og er henni til ráðuneytis eins og nánar er

mælt fyrir í reglugerð þessari. Skal samstarfsnefndin skipuð einum starfsmanni tilnefndum af Sambandi viðskiptabanka, einum tilnefndum af Fiskveiðasjóði Íslands, einum tilnefndum af Iðnlánasjóði, einum tilnefndum af Stofnlánadeild landbúnaðarins og einum tilnefndum af Bygðastofnun og skal hann kalla nefndina saman. Auk þess má kveðja til fulltrúa viðskiptabanka þess fyrirtækis sem um er fjallað hverju sinni.

Stjórn Atvinnutryggingarsjóðs getur einnig haft samráð við Vinnumálaskrifstofu félagsmálaráðuneytis og viðkomandi atvinnumálanefnd áður en ákvörðun er tekin.

Stjórn sjóðsins getur leitað eftir sérfræðiadstoð við tillögugerð og mat á skipulagsbreytingum og aðgerðum til hagræðingar.

Stjórnarmaður skal ekki taka þátt í meðferð máls er varðar fyrirtæki ef hann situr í stjórn eða er starfsmaður þess. Hann skal einnig víkja ef hann er fjárhagslega háður fyrirtæki vegna eignaraðildar, viðskipta eða af öðrum ástæðum. Sama gildir um þáttöku stjórnarmanns í meðferð máls er varðar aðila sem er honum svo persónulega tengdur að hætta sé á að hann fái ekki litið hlutlaust á mál.

7. gr.

Lánveitingum sjóðsins skal skipt í tvo flokka. Annars vegar almenn lán er fylgja skuldbreytingu, sbr. 9. gr., og hins vegar lán er tengjast sérstökum aðgerðum til endurskipulagningar, sbr. 10. gr. Skal við það miðað að almenn lán er fylgja skuldbreytingum fari ekki fram úr 1 200 millj. kr.

8. gr.

Atvinnutryggingarsjóður hefur milligöngu um skuldbreytingu hjá fyrirtækjum þannig að viðkomandi fyrirtæki gefur út skuldabréf til Atvinnutryggingarsjóðs með samanlagðri fjárhæð þeirra skulda fyrirtækisins sem lánardrottinn hafa samþykkt að skuldbreyta og Atvinnutryggingarsjóður fallist á að taka við.

Lánstími skuldabréfanna skal vera allt að 10 ár, fyrsta afborgun sem næst tveimur árum eftir útgáfu þeirra og bréfin skulu síðan greiðast upp með jöfnum afborgunum á sex mánaða fresti. Skuldabréfin skulu miðast við lánskjaravísitölu eða gengi erlendra gjaldmiðla eftir nánara samkomulagi aðila. Þau skuldabréf er miðast við lánskjaravísitölu skulu bera 6% vexti en þó skulu vextir af þeim aldrei vera hærri en vegið meðaltal almennra skuldabréfavaxta á hverjum tíma, samkvæmt auglýsingu Seðlabanka Íslands. Sjóðsstjórn skal ákveða vexti af bréfum með gengisviðmiðun er miðist við erlenda markaðsvexti á hverjum tíma að viðbættu álagi.

Atvinnutryggingarsjóður gefur út skuldabréf til einstakra lánardrottna sem samþykkt hafa skuldbreytingu. Lánstími þessara bréfa skal vera allt að 6 ár, fyrsta afborgun sem næst tveimur árum eftir útgáfu þeirra og ber síðan að endurgreiða bréfin með jöfnum afborgunum á sex mánaða fresti. Skuldabréfin skulu miðast við lánskjaravísitölu eða gengi erlendra gjaldmiðla og bera 1% lægri vexti en skuldabréf samkvæmt 1. mgr. þessarar greinar. Sjóðurinn ábyrgðist greiðslu skuldabréfa skv. þessari mgr. með eignum sínum.

Sjóðnum er óheimilt að gefa út skuldabréf skv. þessari grein fyrir hærri fjárhæð en nemur 2,5-faldri fjárhæð almennra lána er tengjast skuldbreytingu skv. 9. gr., án bakábyrgða banka eða annarra fjármálastofnana.

9. gr.

Almenn lán úr Atvinnutryggingarsjóði sem fylgja skuldbreytingu, skulu vera til allt að 12 ára, afborgunarlaus allt að fyrstu þrjú árin að ákvörðun sjóðsstjórnar en síðan með jöfnum afborgunum á sex mánaða fresti. Skuldabréfin skulu bundin gengisviðmiðun eftir nánara samkomulagi aðila og er heimilt að áskilja að gengisviðmiðun geti komið til endurskoðunar á lánstíma. Stjórn sjóðsins ákveður vexti er miðist við erlenda markaðsvexti á hverjum tíma að viðbættu álagi. Sjóðsstjórn setur almennar reglur um lán skv. þessari grein.

Sjóðsstjórn er heimilt til ársloka 1988, að fengnum tillögum samstarfsnefndar, sbr. 6. gr., að veita bráðabirgðalán til þeirra fyrirtækja sem eiga við bráðan rekstrarfjárvanda að etja enda fullnægi þau ákvæðum reglugerðar þessarar um láns hæfi og jafnframt verði samið um skuldbreytingu.

10. gr.

Lán er tengjast sérstökum aðgerðum til endurskipulagningar skulu miða að því að auka tekjuhæfi fyrirtækja, s.s. með sameiningu þeirra eða samstarfi, með samhæfingu hráefnisöflunar og framleiðslu, breyttu vinnuskipulagi sem leiðir til betri nýtingar á fjárfestingu, sérhæfingu, vöruþróun eða nýjungum í gæðastjórnun eða markaðsmálum.

Heimilt er að veita lán til kaupa á hlutabréfum í fyrirtækjum sem falla undir 1. gr. reglugerðar þessarar. Í sérstökum tilvikum er sjóðsstjórn heimilt að lána til nýrra fyrirtækja sem komið er á fót í stað fyrirtækja sem hættu starfsemi. Þá er sjóðsstjórn og heimilt, ef sérstaklega stendur á, að leysa til sín húseignir og búnað fyrirtækja sem lið í fjárhagslegri endurskipulagningu þeirra.

Lán má því aðeins veita að umsóknum fylgi ítarlegt arðsemismat, kostnaðar- og tekjuáætlun og önnur nauðsynleg gögn er sýni hagkvæmni endurskipulagningar.

Lánstími samkvæmt þessari grein skal vera allt að 12 ár og skulu lán miðast við gengi erlendra gjaldmiðla og bera vexti með sama hætti og lán þau er um ræðir í 9. gr.

11. gr.

Lántakendur hjá Atvinnuþryggingarsjóði skulu setja sjóðnum tryggingar fyrir lánum. Við mat á tryggingum skal stjórn sjóðsins styðjast við eftirfarandi atriði og matsgerðir:

- Áætlaðar tekjur fyrirtækis á móti hreinum skuldum, þannig að ætla megi, miðað við eðlilega rekstrarafkomu, að fyrirtæki geti greitt skuldir sínar á eðlilegum tíma.
- Sjálfskuldarábyrgð banka, sjóða og traustra fyrirtækja eða einstaklinga.
- Sérstakt mat á eignum unnið af atvinnuvegasjóðum, þar sem það liggur fyrir.
- Fasteignamat og endurskoðað brunabótamat fasteigna, váttryggingarverðmæti véla, áhalda, tækja og húftryggingarmat skipa.

Samhliða útgáfu skuldabréfa til Atvinnuþryggingarsjóðs er heimilt að gera sérstakan samning um tryggingu á greiðslu, t.d. þannig að viðskiptabanki lántakanda haldi eftir ákveðnu hlutfalli af fjárhæð við gjaldeyrisskil til viðkomandi fyrirtækis og greiði það beint til Atvinnuþryggingarsjóðs. Viðskiptabanki áriti greiðsluþryggingarsamninga þess.

12. gr.

Við ákvörðun á gengisviðmiðun skv. 8., 9. og 10. gr. reglugerðar þessarar skal gæta þess að áhætta sjóðsins vegna misgengis gjaldmiðla verði sem minnst.

13. gr.

Stjórn sjóðsins auglýsir eftir umsóknum um lán og skuldbreytingar úr sjóðnum og flýta skal afgreiðslu umsókna svo sem verða má.

14. gr.

Öll skjöl viðvíkjandi lánum sem sjóðurinn veitir eða tekur, þ.á m. vegna skuldbreytinga, skulu undanþegin stimpilgjaldi.

15. gr.

Reglugerð þessi sem sett er samkvæmt heimild í 9. gr. bráðabirgðalaga nr. 83, 28. september 1988, um efnahagsaðgerðir, öðlast þegar gildi.

Forsætisráðuneytið, 14. október 1988.

Steingrímur Hermannsson.

Guðmundur Benediktsson.

REGLUGERÐ

um sérstök línu- og netasvæði suður og vestur af Reykjanesskaga.

1. gr.

Frá og með 17. október 1988 til og með 31. desember 1988 eru allar veiðar með botn- og flotvörpu bannaðar á svæði suður af Reykjanesskaga, sem að austan markast af línu, sem dregin er frá Selvogsvita í punkt 63°30 N, 21°39 V. Að sunnan markast svæðið af línu, sem dregin er úr punkti 63°30 N, 21°39 V í punkt 63°40 N, 22°32 V. Að vestan markast svæðið af línu sem dregin er úr punkti 63°40 N, 22°32 V réttvísandi norður af Staðarbergi.

2. gr.

Á tímabilinu frá og með 17. október 1988 til og með 31. janúar 1989, eru allar togveiðar bannaðar á svæði út af Faxaflóa, sem að sunnan markast af línu, sem dregin er réttvísandi 270° frá Sandgerðisvita. Að vestan markast svæðið af 23°42 V og að norðan af 64°20 N.

Á tímabilinu frá og með 1. febrúar 1989 til og með 7. maí 1989 eru allar togveiðar bannaðar á svæði sem að sunnan markast af línu sem dregin er réttvísandi 270° frá Stafnesvita. Að vestan markast svæðið af 23°42 V og að norðan af 64°20 N.

3. gr.

Brot á ákvæðum reglugerðar þessarar varða viðurlögum samkvæmt ákvæðum laga nr. 81 31. maí 1976, um veiðar í fiskveiðilandhelgi Íslands. Með mál út af brotum skal farið að hætti opinberra mála.

4. gr.

Reglugerð þessi er sett samkvæmt ákvæðum laga nr. 81 31. maí 1976, um veiðar í fiskveiðilandhelgi Íslands til að öðlast þegar gildi og birtist til eftirbreytni öllum þeim, sem hlut eiga að máli.

Sjávarútvegsráðuneytið, 11. október 1988.

F. h. r.

Árni Kolbeinsson.

Jón B. Jónasson.